



Tir Yimyim

www.tiryimyim.in

e-mail : tiryimyim@gmail.com

Regd. No. RNI. NAGAAO/2004 / 13113. Postal-NE/RN-717.

TAPAK 8 Yangia anidakangma : Tir Yimyim tiryimyim@aolima tir yimyim TAPAK 7

Taoba CFA mendenbuba taküm tepeyong tepuokdaki yokogo

VOL. XXI ISSUE NO. 164 (ADOK 164) DIMAPUR RASEMNÜ (WEDNESDAY) METSÜREMI (MARCH) 27, 2024 ₹ 5.00

PoK ya India nung shilem ka lir: Amit Shah

New Delhi, March 26, 2024
(Agencies): Pakistan Occupied Kashmir (POK) ya India nung shilem ka lir aser idakji Muslim o Hindu nunger ajak India nunger ama lidar ta Union home minister Amit Shah-i ashi.

"BJP aser Parliament ajungai POK ya India nung shilem ka ta amanger. POK nung aliba Muslim aser Hindu nunger ajak India sensotem aser aliji India meyong saka Pakistan-i atsüngä agia lir. India senso shiai, Kashmiri shiai iba ali meyipa aginür" ta Amit Shah-i Mongulbarnü ashi.

Kashmir Valley nung alirtem dang Arrla 370 aibelena agienra Kashmiriyat sobaliba, oshi aser maitsü nung kongshitsü ta sayu. Arrla 370 agienür küm 5 süiogo saka iba amaji kecha matalok. Kashmiri nunger tanü talenba kecha mali, Kashmiri nunger oshi aser achiajembä sobaliba tajungba kümogo aser tourist temi Kashmir nung tourist spots semdancer" ta paisa metedaktsü.

Nisung lakh aika Kashmir-i

aotsü aser iba ajanga Kashmiriyat samatsütsü ta ashi saka tanübo ibaji tiyazü ta jangjadaktsügo ta Amit Shah-isa shisem.

"Arrla 370 kübok balaka razuka aotsü tangatetba ka adokdaktsü aser Jammu and Kashmir nung lanur aika kiralongraba leni anisa. Pakistan-i iba tensa mashileni amshi aser testüba küm 40 tsüngda lanur 40,000 tema taküm samaogo" ta paisa ashi.

"Saka tanübo Jammu and Kashmir terenlok lenmang nung jajadar. Kiralongraba maparen temleni arur, lung agi ona lungkak aitba anenogo. Ochimashi anendaktsütsü atema anti-meyipzüka sayu. Arrla 370 agienra Kashmiriyat sobaliba, oshi aser maitsü nung kongshitsü ta sayu. Arrla 370 agienür küm 5 süiogo saka iba amaji kecha matalok. Kashmiri nunger tanü talenba kecha mali, Kashmiri nunger oshi aser achiajembä sobaliba tajungba kümogo aser tourist temi Kashmir nung tourist spots semdancer" ta paisa metedaktsü.

"Kibongtemi yimsü asüba telok asem- Congress, National Congress aser PDP ajanga teti democracy asoshi tenokdangba agütsü. Modi prime minister maküm tashi Jammu and Kashmir nung panchayat elections magidang saka tanübo nisung 30,000 temai iba nung shilem agidar" ta paisa ashi.

Kejriwal pua maru. Kejriwal-i ochimashi inyakba osang sorkari meteta ali asünungbo idangisa pa apüsüla" ta pai metedaktsü.

"AAP-i INDIA bloc nung adenba sülen BJP-i Delhi aser Punjab nung parnoki tamakok angutsü jangjajangja metet. Tang parnoki Kejriwal reshikangshinür" ta Antony-isa shisem.

"Electon agitsü lia pa apuba anema onoki ola adoker. Kejriwal-i ochimashi inyakogo ta ashiba nung onok noktaka lir saka Kejriwal apuba anema onok noktaker kechiyong iba ya opposition azüoktsü merangba mapa ka lir" ta pai ashi.

"PM Narendra Modi-i sorkar ketdangsübare nung tashiyim amshir aser democracy ajembangtsü atema tashiyim agi sen sarur aser pa den tokteperem alenbanger. PM Modi-i electoral bonds, PM Care Fund amala inyakyim ajanga ochimashi inyakogo" ta Antony-isa tai tongloksü.

"Nagaland nung alirtemi Centre nung lisopurtem tsüngda raratepdaktsüba kasa sorkar lidaktsünür asü masü telemetba tajungka agitsü mepishir" tapaisa ashi.

Dimapur, March 26, 2024
(Agencies): Centre nung BJP sorkari 2024 Lok Sabha elections sülen parnok atsüngdoktsü tsübuba agi Opposition lennirtem apur aser reshikangshir ta AICC national spokesperson aser Northeast region atema media coordinator Mathew Antony-i ashi.

ED-i apuba ajanga Jharkhand chief minister Hemant Soren tashiyim agi menden nungi aludaktsü aser tang Delhi chief minister Arvind Kejriwal pua lir ta Dimapur nung osangbener den jembidang Antony-i ashi.

Congress-i 2022 nung Kejriwal anema ochimashi ken o benok aser onok iba nung noktaka lir aser timi bushisüngdang südaktsünür, ta pai ashi.

Ajisüaka, Lok Sabha elections agitsü osang sangdongba aser AAP-i INDIA bloc nung adentsü lemtetba sülen Delhi CM Kejriwal apuba Congress-i magizüker, ta Antony-isa ashi.

"February 26, 2023 nü taoba Delhi deputy chief minister Manish Sisodia apu anungji kechiba ED mesüra CBI-i Sisodia apuba sülen ita ishika tsüngda

INDIA bloc-i sorkar akümba sülen Congress-i Nagaland atema inyaktsü



(Abelen) INC candidate Supongmeren Jamir aser (achiji) NDPP candidate Dr. Chumber Murry nati March 26, 2024 nü Commissioner Nagaland & Returning Officer, Sushil Kumar Patel IAS tsüngdang Lok Sabha Election 2024 atema nomination paper agütsüdang agiba noksatem angur. (DIPR)

Kohima, March 26, 2024

(TYO): Centre nung INDIA bloc-i sorkar akümba sülen Naga yimten tebilemtsü aser Eastern Nagaland statehood takhangbatem dena Nagaland nung alirtem indang khuret ajak Congress-i inyaktsü nangzükogo.

Mongulbarnü Congress Bhavan nung election campaign tenzükba sentong nung NPCC president aser Lok Sabha atema INC candidate S. Supongmeren Jamir-i iba ya nangzük.

"Nagaland nung Peoples' Democratic Alliance (PDA) sorkar aser Centre nung BJP-i aniba NDA sorkari Naga nunger taginüba metongtsür" ta Supongmeren-i ashi.

Sorkar anaprongi Naga yimten latetsü aser Eastern Nagaland Peoples' Organisation (ENPO)-i state balaka meshiba atema temulung magütsür. Sorkartemi Naga nunger ashioktsür ta pai ashi.

"PDA sorkari kodanga Naga nunger asoshi bilemja mali aser Naga yimten tebilemtsü nung teyariteper ka ta shiaka parnoki Naga nunger asoshi mebilemtsü aser Centre nung BJP sorkar atema dang teyariteper tajung ka lir" ta Supongmeren-i ashi.

BJP-i nübo agi tangar memeneperem taginüba anema noktaker anungji parnoki tezungzükter agiba nung 'secularism' ojang agienür aser Khristantem teimba ser aliba state ka nunga Deobarnü sentongtem agidaktsür, ta pai ashi.

"BJP-i Citizenship Amendment Act aser Uniform Civil Code benokra state sokari Centre lemtet anema

menoktaktsü kechiyong MLA 60 ya Naga nunger asoshi masü saka RSS-BJP policies nung yariteperem lir" ta paisa ashi.

"PDA ya BJP indang agent tongtiba lir aser parnoki Naga nunger taginübatem samatsütsü meranger. Election shia parnoki nangzükera saka Naga yimtenbo melateter anungji parnoki Naga nunger kobika külakoktsütsü. Naga nungertemi taruba elections nung maongka agia Centre nung BJP sorkar atsüngdoktsü atema vote enoktsütsü ayongzük" ta Supongmeren-isa metedaktsü.

Rahul Gandhi lenisüba kübok Congress-i Naga yimten tebilemtsü aser ENPO khurettem atema kanga süoki ia bilemer. INDIA bloc-i sorkar akümba sülen Congress-i item ken o tem süoki ia inyaktsü, ta paisa ashi.

"Congress ya secularism aser nübo agi tangar memeneperem

asoshi lir aser onoki maneni ochimashi anema raratsü. Naga nunger sobaliba, inyaksangshi aser tebilemtsütem anema inyakba party den onoki raratsü" ta Supongmeren-isa shisem.

Iba sentong nung mendenji NPCC working president Khriedi Theünuo liasü, Rev Nungsang-i temoatsü meshia sarasadem aser NPCC vice president G K Zimomi-i anküp tepela o jembi.

"Taoba Rajya Sabha MP aser MLA C Apok Jamir-i Congress nung tanaben denogo. Pai

Naga Peoples' Front toktsür Congress nung aden" ta G K Zimomi-i metedaktsü.

Tanü Supongmeren den külemi pa substitute candidate Nagavito nati Lok Sabha election atema nomination süogo.

"Aruya aliba elections nung nübor temi Congress nem vote enoktsütsü tamang akar" ta Supongmeren-isa ashi.

Dr. Chumber Murry-i nomination süogo

Kohima, March 26, 2024

(Agencies): Lok Sabha election atema NDPP candidate Dr. Chumber Murry-i tanü nomination süogo.

Nagaland nung MLA 60 prong teyari ajanga ni election nung takok tulu angutsü" ta Dr. Murry-i ashi.

"Ni Parliament nung amentsü maongka ngura, MLA aser Nagaland nung alirtem asoshi ola asütsü. Talisa ni Naga yimten tebilemtsü atema inyaktsü" ta pai ashi.

Dr. Chumber Murry ya Nagaland nung Peoples' Democratic Alliance (PDA) indang consensus candidate lir.

PDA nung NDPP, BJP, NCP, National Peoples' Party, LJP (Ram Vilas), Naga People's Front (NPF), RPI (Athawale), JD(U) aser Independent MLA tem dena lir.

BJP lennir aser Deputy Chief Minister Y. Patton-i tanü Dr. Murry-i nomination asüdang meina ao.

ENPO-i elections nung shilem magitsü ta ashiba atema osangbeneri asüngdangdang "March 28 nü Eastern Nagaland Legislators Union-i ENPO aser kin teloktem den senden amenba sülen ang sorkari mera agitsü" ta Y. Patton-i langzü.

Assam Excise Department-i April 1 nungi yi jenjang atutsü

Guwahati, March 26, 2024

(Agencies): Assam nung April 1, 2024 nungi yi jenjang atutsü ta Assam Excise Department-i metedaktsü.

Indian-made foreign liquor, beer, wine aser ready-to-drink beverages ajak dena alcoholic

beverages ajunga nung jenjang metedaktsü.

Beer 650 ml bottle shia nung Rs. 33 nungi Rs. 43 aser Indian-made foreign liquor telesma balala 750 ml bottle shia nung Rs. 530 (minimum prices) jungnua ayutsü ta Excise Department-i

metedaktsü.

Canteen Store Depots (CSD) aser paramilitary wholesale warehouses nung beer 650 ml bottle ka nung Rs. 16 nungi Rs. 20 (minimum increase) aser IMFL 750 ml bottle ka nung Rs. 262 tashi atutsü.

DIMAPUR AO BAPTIST AROGO

HEALING MINISTRY TANEPTSÜ SENTONG

DABA Main Church nung April 3, 2024 anepdang 7:00 AM nungi sentong tenzüktsü. Tamang agi nisung ajak arua adentsü pelashishia jaoker. Tsüngrem asoshi kecha tamakotsü mali. Yisui la dang ashi "Tenü, ne tamang agi na junga kümogo... junga liang." Mark 5:34

Sd/-
Pastor, DABA

Game Developers Conference, USA nung Nagaland nungia aden



Kohima nung amenoka aliba game yangluba studio, ReDimension Games nungi San Francisco, California, USA nung March 18-22, 2024 anogotem aliba Game Developers Conference (GDC) nung dena liasü.

Dimapur, Metsüremi/March 26 (TYO): Kohima nung amenoka aliba game yangluba studio, ReDimension Games nungi San Francisco, California, USA nung March 18-22, 2024 anogotem aliba Game Developers Conference (GDC) nung dena liasü.

ReDimension Games ajanga yanglutetba Sojourn Past ya Indian Pavilion kubok India nungi danga games tem den külem shilem agia liasü.

ReDimension Games studio indang co-founder Pekrukhrietuo Pienyü-i iba Game Developers Conference nung oa aden aser iba sentong ya global audience atsur arutsü aser global game development industry aser külem game developers den sendakteptsü

maongka tajung ka liasü ta ashi. Alima nung Game yanglurtem asoshi iba Game Developers Conference ya küm shia amungba sentong tulutiba lir. Iba sentong ya anogo pongu tashi agir aser yangji alima tesem balala nungi game yanglurtem arua shilem agia pei yanglutetba games sayur aser shisa lemsateper.

15 buba India Games Developer Conference (IGDC) nung ReDimension Games ajanga Sojourn Past atema "Upcoming Game of the Year" sempet ngua liasü. IGDC ya India nung game yanglurtem atema senden tejetibya aser tulutiba lir, koba Hyderabad nung November 2023 nung munga liasü.

South Korean game

publisher, KRAFTON India koba ajanga PUBG: Battlegrounds, New State Mobile aser TERA ama nüngtugu games tem yangluba lir, parnoki Sojourn Past atema ReDimension Games ya inaugural cohort KRAFTON India Gaming Incubator (KIGI) program indang start-ups ana nungi ka asütsüshima liasü, kong studio nem senotsü, resources aser industry nungi takotet nisung temi shisatsü agütsütsü.

Sojourn Past ya action-adventure game ka lir, kong asayar temi visuals balala nung tekolok shisatsü amshir.

Iba game sangdongtsü anogo ano memetetdaktsü aser Steam nung iba game ya wishlist sur alia asayatetsü.

Rubber Tapping & Processing training temogo



Resource Centre, Ruzaphema nung rubber lu ayimer nem anogo ti training agütsüba sülen tangokba noksa ka nung Rubber Board aser Land Resources Department nungi ketdangsürtem den training agirtem angur.

Dimapur, Metsüremi/March 26 (TYO): Tappers' Intensive

Skill Improvement Programme for Rubber Farmers kubok Rubber Board Regional Office, Dimapur aser Department of Land Resources lungjemer Resource Centre, Ruzaphema nung ayongzükba Scientific Method of Rubber Tapping & Processing training sentong March 18, 2024 nü tenzükba Mongulbar nikongdang tembanggogo.

Iba training tembangga sentong nung Gauranga Das, Deputy Rubber Production Commissioner and In-charge of RBI Office, Dimapur aser. Albert Ngullie, Director, Land Resources nungertem dena liasü aser Hekato N, Additional Director, Land Resources menden liasü aser training nung shilem agir nem parnoki kulizüng

kaket agüja liasü.

Iba sentong nung jembidang, süngtong mapang talangba takum kumzüka ayutsü aser ngisa tali agizüktü atema scientific yimya nung ngisa agizüka amshiba yimya meteta alitsü kanga tongtipang lir, ta Gauranga Das-i ashi.

Department of Land Resources aser state nung rubber lu ayimer den amalitepa yaritepba asoshi Alber Ngullie ia Rubber Board dang pelaba lemsatepe.

Rubber tsünuba nungi sen yokzükba indanga pai ashi aser training agirtem dang iba training nung angazükba shisatsü tajungtiba nung amshitsü aser dangar rubber lu ayimer tem dena liasü aser training agütsütsü ayongzükba liasü.

Hekato N-ia iba anogo ti training takok ngua agiogo aser training nung adenertem

tangazükba jenti bener aor, ta ashi. Chümukedima, Niuland, Peren, Tsemintu aser Zunheboto district tem nungi rubber lu ayimer nisung 15 nem Nabajyoti Baruah, Assistant Development Officer, RBI; Z. Kitoholi Jimo, Assistant Development Officer, RBI aser Manoj Taid, RTD, RBI nungeri training agüja liasü.

Training agirtem rongnungi Yetoshe Achumi ajanga tajangshibatem lemsatep aser rubber lu ayimtsü atema shisatsü jenti nguogo aser tarutsü nunga iba training nung adenba yagi yaritsü ta ashi.

Alemla Aier, DPO, LRD Chümukedima ajanga kulizüng kaket ya agüja liasü aser V. Vikugha Sema, Project Officer, LRD Directorate ajanga melepzung o jembia sentong tembang.



OFFICE OF THE
LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614. Dist. Mokokchung : Nagaland

Email : Langpangkongkaketshirmungdang@gmail.com

Ref. No. LKM/GS/C-E-YY-02/2024

Date : 25/03/2024

AYIMOKTSÜR

Langpangkong Kaketshir Mungdang Mendenti ajanga mapang aser tensa dak apet 'CLEAN ELECTION' nükmen meraksai tasa sentong balala ajanga tanenmakai nubur ajungmosotsü tejangraba aser telemtetba LKM Sanen Luden Senden Sitting no. 6 ajanga akangshia lemtetoko.

Anungi, asen Naga kin nubur ajaki aser talisa Langpangkong sangeri maneni LKM 'CLEAN ELECTION' dak rangloker aruya aliba LOK SABHA aser ULB ELECTION nung shilem agitsü nenshia ayimoktsür.



IMLINOK
PRESIDENT LKM
President
Langpangkong Kaketshir Mungdang



MEYITONGPANG
GENERAL SECRETARY LKM
General Secretary
Langpangkong Kaketshir Mungdang

NSCN/GPRN ajanga asüku lemsatep

Dimapur, Metsüremi/March 26 (TYO): Eden Hospital

Dimapur nung March 26, 2024 nü tia makai N.Ghoshito Achumi asüba osang angashia temulung shiranger, ta Akato Chophi, president, NSCN/GPRN ajanga sangdong ka nung ashi.

Asür Ghoshito-i mapa tajung inyaka yutsüba aser lenla balala nung mezüngpur süa yimzung meimba ajaki bilemtettsü, shiba par tanurtem asoshi temeim agi sünge aliba tebu aser külem sensopur asoshi tembar tajung ka liasü.

Pai takok balala anguba den külemi pa ya Dimapur Naga Students' Union tenzüker/tir ka liasü.

Pa ya DMC (tamalen Dimapur Town Committee ta

DC Chümoukedima ajanga metetdaktsür

Dimapur, Metsüremi/March 26 (TYO): Lok Sabha atema

aruya aliba General Election 2024 mechi Office of the Deputy Commissioner, Chümoukedima nung Call Centre/ Complaint Monitoring Cell temeja ka amenoka lir, ta Deputy Commissioner,

Ajit Kumar-i SVEEP indang lemsatep

Dimapur, Metsüremi/March 26 (TYO): Imkongmeren

Sports Complex, Mokokchung nung March 23, 2024 nü Inter-Ward Football asayadang Assistant Commissioner, Mokokchung, Ajit Kumar, IAS ajanga temelensi bener arutsü atema nisung ajaki vote agütsütsü temeden metettsüla aser vote agütsütsüla, ta ashi.

Lanurtem nem electoral awareness agütsütsü atema Election Commission of India



Mokokchung, March/Metsüremi 26(TYO): BJP Mokokchung District-i tanü Mokokchung District GB Association Office nung amshitsü asoshi cabinet (almirah) ka tenla agütsüogo. Mokokchung District GB Association asoshi kanga dang nungtaka aliba oset tenla agütsüba asoshi tepelaba GB Association Tir Along Jamir ajanga BJP Mokokchung dang metetdaktsü. Iba tenla agütsüba mapang tangokba noksa.

Delhi HC-i Bodhbarnü Kejriwal temepeshiba angadangtsü



Delhi Chief Minister Arvind Kejriwal apuba atem AAP puri longkak aiba setong ayongzuka agiba mapang security temi Patel Chowk metro station kima ID card asadangba noksa nung angur.

New Delhi, Metsüremi/March 26 (Agencies): Excise policy ochi mashi ken o nung aija Enforcement Directorate-i Delhi chief minister Arvind Kejriwal apuba dak sendakba nung pai temepeshiba ka agütsüba Delhi High Court-i Bodhbarnü angadangtsü.

Iba ken o ya justice Swarana Kanta Sharma indang bench kati angadangtsü. Kejriwal ya March 28 nü tashi ED ket nung ayutsü. Pa ya Delhi excise policy dak sendakba nung iba central agency yagi puogo.

Aam Aadmi Party convenor

yagi ED custody nung aliba mapanga maneni sorkar achaayangdar. Mongolbarnü pai, sorkar mozuki ajak aser Mohalla Clinic tem nung nüburtem atema mozü peria tokstsü aser tetendangba balala tamakok malui südakstsü atema tetuyuba agütsügo, ta health minister Saurabh Bharadwaj-i ashi.

Iba tetuyuba agütsüba ajanga, ED ket nung liaka Kejriwal-i Delhi nung aliba nüburtem atema maneni bilemba aliba sayur, ta minister yagi shisem.

Delhi excise policy case 2022 benoktsü atema yangluba

dak sendakba nung senotsü ochi meshi-i benshiba atema aija iba ken o benoka lir. Iba policy ya tangbo aginatokogo.

Excise policy ken o nung Manish Sisodia aser Sanjay Singh na apuba sülen AAP lenirtem rongnung Kejriwal ya tasembuba lir.

Sisodia, shiba Delhi deputy chief minister aser portfolios 33 nungi 18 bo bona liasü pa ya taoba küm February 26 nü CBI-i pua liasü. Iba sülen pa senotsü ochi meshi-i amshiba ken o nung ED-i apu. Taoba küm October ita 5 nü ED-i Sanjay Singh puogo, shiba Rajya Sabha MP ka lir.

Himachal bypoll: BJP-i taoba Congress MLA 6 prongla shimogo

New Delhi, Metsüremi/March 26 (Agencies):

Bharatiya Janata Party (BJP)-i Himachal Pradesh assembly by-election nung tokteptsü atema Congress party nungi disqualify sütsür aliba MLA trokprongla shimogo. Taoba Congress MAL trok den Independent MLA asem shirnoki assembly nem resignation agütsügo, parnok ajak taoba Honibarnü BJP nung denogo.

MLA tem rongnung Sudhir Sharma, Ravi Thakur, Rajinder Rana, Inder Dutt Lakhanpal, Chetanya Sharma aser Devinder Kumar Bhutto densema lir aser parnok Union minister aser Hamirpur MP Anurag Thakur, taoba Himachal Pradesh chief minister Jai Ram Thakur, national general secretary Arun Singh aser state unit Tir Rajeev Bindal nunger matsüngdang BJP nung dena liasü.

BJP-i, Dharamshala nungi Sudhir Sharma, Lahaul nungi Ravi Thakur, Sujanpur nungi Rajinder Rana, Barsar nungi Inder Dutt Lakhanpal, Gagret nungi Chaitanya Sharma aser Kutlehar nungi Devinder Kumar Bhutto shimogo.

Menden trok atema by-election ya June 1 nü agitsü aser kasa anogo state nung Lok Sabha menden pezüprongla atema election agitsü.

Congress party indang whip kati, cut motion ka aser budget mapang House-ia arua sorkar pusema vote agütsütsü tetuyuba agütsüba tashi mangaba atema MLA trok ya February 29 nü mapa nungi anenja liasü.

BJP lenirtemi ashiba agi, Centre sorkari state nung highway aser rail project densema terenlok asoshi project balala benokogo aser taoba MLA temi Ato Kilonser lenisüba tashi taitba kümdakstsü atema telemtetba agiogo.

Congress MLA trok disqualify sütsüba sülen züngsem 62 agi kümtetba assembly nung Congress pur menden 39 aliba 33 dang kümogo. Kasa mapang nung BJP pur menden 25 lir. Speaker shibai floor test nung tie asüba mapang dang vote agütsütsü, pa Congress party nungi lir.

Maneni Independent MLA asem mapa nungi anenba ajanga assembly nung Congress party tashi meiti kümogo.

Adhir Ranjan-i Varun Gandhi Congress nung adentsü jaok



New Delhi, Metsüremi/March 26 (Agencies):

Lok Sabha nung Congress lenir Adhir Ranjan Chowdhury-i Mongolbarnü Bharatiya Janata Party (BJP) MP Varun Gandhi Congress nung adentsü jaokogo. Varun nem pa indang constituency (Pilibhit) nungi ticket magütsüba sülen pa Congress-i jaoka liasü.

"Pa (Varun Gandhi) ya tai maketba tashi tait lenir ka aser pa Gandhi'er kibong den sendaktepa lir. Ibayongji BJP-i pa nem (Lok Sabha poll) ticket magütsü. Pa Congress nung aden nung junger ta bilemer aser pa denra onok kanga pelatsü," ta Congress lenir yagi ashi.

Pilibhit constituency atema Varun Gandhi ya Uttar Pradesh minister Jitin Prasada-i melenogo. Pa tetsü Maneka maneni Sultanpur nungi tokteptsü atema BJP-i shimogo.

Prasada shiba Manmohan Singh-i aniba Congress sorkar nung anaben tashi minister liasü aser Rahul Gandhi nem teyari agütsürem rongnung tongti ka

ama züngshia liasü, pa 2014 aser 2019 küm Lok Sabha elections nung tamakok ngua liasü. Iba sülen pa küm ana tejakdang BJP nung aden aser 2021 küm UP Legislative council nung shimogo.

Arishi küm 44 tain Gandhi-i tawa ken o balala dak sendakba nung Centre nung par sorkar aitsügo. Pa nem ticket magütsütsü akok ta bilema aliba mapang Samajwadi Party-ia pa parnok rongnung dendakstsü tejangraba aliba lemsatepogo.

"Onok kishi ajak atema lapoka lir," ta SP Tir Akhilesh Yadav-i ashi.

Varun Gandhi ya Sanjay Gandhi'er jabaso lir aser pa mezungbuba 2009 küm Pilibhit nungi Lok Sabha MP asütsü shim. 2014 küm pa Sultanpur nungi toktep aser tetsü Maneka Pilibhit nungi toktepa liasü.

Toba küm Rahul Gandhi dang pa adianu Varun Congress-i meyipa arutsü asü ta asüngdangba mapang Rahul-i tena tebilemdangba meputep ta langzü.



Taruba election atema nomination file asüba mapang Congress lenir Kamal Nath, par jabaso aser Chhindwara Lok Sabha constituency nungi Congress candidate Nakul Nath na tangokba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, MARCH (METSÜREMI) 27, 2024

Saisapong nung asentensi

Tanü asünka ya Nagaland tesem aika nung lanurtem saisapong nung jangraba angur. Item lanurtemji kar anepdang yakta yimdong sema asemya angur, kar football, kar basketball, kar volleyball, tennis aser kar cricket ama ball amshia asayaba asaya tapu balala nung temulung agüja asayaba angur. Ano, karbo badminton aser table tennis ama nung jangraba angur. Ano, tanü asüng asenok asoshibo asaya tasen ta asütsü atsü atsüdanger asayaba asaya 'futsal' tesem tesem nung asayaa angur. Ano, karbo tsüngtepba, melangtepba aser tetsüng agi metsütepba raraba asaya tapu balala nung taküm ajak bendanga agüja asayaba agi nüngtugu akümba angur. Iba ama lanurtem saisapong nung jangraba mapang nung ano tali jangradaktsüsü atema Nagaland government aser Nagaland Olympic Association teloki Nagaland nung taoba hopta nung North East Games 2024 ayongzüka asayadaktsübaj i senotsü endokba dang nungib Naga nunger lanurtem asoshi tajangzük tuluba angur asütsü. Atangji, saisapong ayongzükbaj i takok tokteptsü atema ayongzüker, anungji shir teloki, koba state-i aser shibai takok tajungba angur ta asüba tongtibang akümer. Ajisüaka, tang dang atemabo Nagaland asoshibo tanü takok aser tamakok angubaji masü saka tangar asen limai jaoka sayidaktsüba ajanga asen lima nung lanurtem rongnung asaya tali jangradaktsüba aser asaya tapu balala atema asayadak Kohima, Chümoukedima aser Dimapur district-tem nung yangluloka aoba terenlok mapatemjiang tajangzük asütsü. Naga nunger tem ya, odanga, saisapong jangraba nisungtem lir, anungji nisung shiai asaya ka nungbosa jangrar aser masayaaka nisung ajaki tangar asayababo reprangner. Ajisüaka, asenok ajaki bilemdangtsüba kaji, Naga nunger ajaki asaya jangrar aser asayar ser nung tangar koka masayateter. Iba lagi, asayaba ajanga nüngtugu dang masü saka takar kuma asayateta aoba nisung kata mangur. Atangji, tejangrar ajak tajung aser nüngtugu akümtsü ta masü saka putu shia alimai züngshitsü Naga nunger tem rongnung asaya ka nung mesüra ka nungbosa adoktet nungbo, iba jagia alimai Naga nunger jangjatsü aser asaya ajanga Naga nunger tem rongsen tsütsü anisüngzük angutsü. Iba jenjangji atongtsü atemabo tangar temang anema alitsü atema asayaba dang nungi noklangben agi tali bendanga tagütsüba agüja asayatsü nüngdaker. Iba denji government-i dang masü saka yimtak aser town nunga pei pei yimteni anepalua mepu aser kiyong shia asayadak yanglua anepalutsütsüla. Ano, saisapongba tsütsü yabo arogoia shilem tulu agitetsü, kechiyong tanur aser lanurtem nem Tsüngrem temeim metetdakja nisung tajung kümdaktsüsü atema asaya ya Yisu dangi parnok anir aruba lenmang amai amshitsüla. Iba tangatetba nung tenla ki, office aser guest aser rent house nung sen endokba ama tanurtem aser lanurtem asoshi asayadak ground aser ki yangluja saisapong ajanga parnok Yisu dangi anidentsü merangra, tenla ki kilong nung asentensi sentong akaba dang nungi tanur aser lanurtem asoshibo ajiang tekongshiba aser tajungba asütsü. Iba nukjidong nung tamangertem tenla meranga benra aser arogoia küm nung tenla aruba nungi tanurtem aser lanurtem saisapong tsütsü renlokdkja tamanger tajung kümdaktsüsü asoshi 10% budget nung enoka inyak tenzükra, küm 10 tsüngda asenok arogotem nungi asayar tajung dang masü saka tamanger tajung adoktsü. Kasaji, yimtak aser town nunga yimteni tanurtem aser lanurtem asaya tapu balala nung jangradakja asayadaktsüra, küm 10 tsüngda asen lima ya asayar tajung dang masü saka temang anema aliba aser peisasa pei takum azükteta aliba senso tajung agi asüngrtsü. Tangbo Kohima, Dimapur aser Chümoukedima nung dang asayaba tesem kar junga anepaluba angur. Itemji ano maneni tajungba aser tuluba renloka aodang Dimapur nunga state stadium renemtsü aser tanga tanüngba district-tem nunga constituency shia yimten lenirtemi anir lokti aser arogo lenirtemi saisapong nung asentensi tulu adokdaktsüsü sentong tajung yanglua inyaktsü mapangi akanger.

OLEMSABANG

Lok Sabha Election nung Khristan-temi koda shilem agitsü ???

~ L.Kika Pongener.

India lima ajunga nung tang aruya-a aliba Lok Sabha Election ya Khristan-temi atema aser kin tilatem (Minorities) atema kanga shisa ka-a inyaktsüba mapang ka asütsü. Talisa, asen Naga nunger Khristan-temi atema-a iba Election ya tamang tendangba mapang ka asütsü. Nisung aikati yimden-ren (Politics) aser tamangbarren (Religion) anaji balala, anungji meyoktepa magatetsüla ta ashitsü akok. Hau...lenmang kar nungpo aji shitak, saka tanü India lima nung tatalokbatem ya asadanga reprangdangra, akhidang tangar sorkar-i yimsu asüba mapang kin tilatem mezüngmeshiba, amokmerenba aser reshikangshiba, tang amaibo mali asü. Indian temzung (Constitution) nung tamangba yimsu pei amangnuba amangtsü (Freedom of religion) ta tejangja shia liaka, tanü State aika nung kechi ataloker (?) Teshisadangtsü aika lir. Anungji Naga nunger Khristantem 19th April Election nungji yimden bangdak tashi (Political Power) aser 'SEN' tashi (Money Power) nem kokdaktsüsü asü (?) Mesura asen tamangba aser ayak wazuka ayutsü (?)...ta asüba tasüngdangba tuluka lir. Anungji asenoki iba ana rongnungji kanga shisa ka-a telemtetba agitsüla.

Ni Political Party shinga anema-a mejembir aser Party kata maitsür. Political Party ajungaji linuk terenlok aser tejakleni anitsü nukjidong nung tenzükba lir. Ajisuaka, tanü Center sorkar inyakyim aser State-tem nung tatalokbatem angudang, oda sorkar-i ajungoktsür inyakdaktsür amai temulong malemtsüa tatalokba aika ngua kanga-sa aoksar...!!! Ita ishika tejaklen asen kidanger Manipur nung atalokba otsü asenok ajaki meteta lir. Kin ana tsüngda nung kin ka Schedule Tribe jenjang nung züngokba mechii nung rara adok, saka shitakba nung tatalokba mapaji reprangdangra...Kin ana tsüngda raraba tongtipangba masü, Khristan-temi tenlaki raksaja, Khristan-temi tenla kidang külema lia amokmerena amakba tatalokbatem ang tuluba liasü...!!! Aser iba ama tashiyim mapa inyakba nokdangtsü atema tanü tashi nung Center sorkar nung yimsusur tazüngpurtemi mera agiba (Action) tsüngsu kecha mali...!!!! Teshisadangtsü tuluka lir. Anungji iba mapa ya sorkar-i ajungoktsür inyakdaktsüba amai nuburtem-ibo temulong melemi bilemer.

Tanü India lima nung tatalokba tongtipang kar reprangdangdi...State aika nung tangar sorkar-i yimsu asüba mapang matalokba/meinyakba aika, tang aliba sorkar mapang atalokba/inyakba ngudagi. State aika nung Khristantem/kin tilatem (Minorities) mezüngmeshiba, reshikangshiba, amokmerenba, lokti-i tetsür taküm raksatsüba (Gang rape) tesem aika nung ataloker. Aser Police Station nung FIR lodge asünung magizükba aser Police-iang meyiper amokmerenba angudang aoksar...!!! Ajiser, sorkar ozüng amertemi mapa tamajung inyakertemji azüoktsü melena tepo kuma jembiba/inyakba angudang aoksar...!!! State aika nung Khristan-tem kangshia Hindu yimsu dangi meyipdaktsüba, Christian Missionary-tem, Preist-tem aser Pastor-tem aika züka merenshiba aser tepsetba tatalokbatem 'Social Media' balala nung angur...!!! Ajisuaka, sorkar ozüng amertemi iba ama tashiyim mapa tamajung inyakertemji merenshitsü melena, meyiper parnok tepo akümba agi, mapa tamajung inyakertemji temulong uludakdaktsür. Anungji iba ama tatalokbatem angudang, iba mapaji sorkar-i ajungoktsür inyakdaktsür ama temulong melemi bilemer.

Tang yimsu sua aliba sorkar mapang Christmas anogo nung "Good Governance Day" amongtsü telemtetba agiba nguogo. Taoba mapang Khristan-tem teimba aliba State nung Bye Election agidang Deobar anogo nung Vote azüngtsü lemtetba nguogo. Tanü India nung UPSC/SSC/SSB/Banking Service etc. Exam. ajunga Deobar anogo nung dang agir. Deobar anogo nungang 'Social Work' inyaktsü ayongzüker. Asen kidanger Assam nung tawa-ang Christian-temi tanepstsüba mapa inyakba nokdangtsü ozüng yangluba nguogo. India nung State aika nung 'Anti Conversion Law Bill Passed' suogo. küm ana-asem tejaklen India nung University/Institute/College kar nungpo 'Jai-Matadi' aser 'Hi-Ram' ta mashiba mechii nung kaketshir karbo amokmerena merenshiba-a angashia aruogo. Alima ajunga nung tembartem anogo 'Valentines Day' nung India nungpo 'Cow Hug Day' amongtsü sangdongba-a angashiogo. Ano India nung tamangba yimsu ka dang asütsü aser oshi ka dang asütsüba ozüng yanglutsü kanga-sa merangdag. Aji oda, India ama kin aika aser oshi aika meyoktepa aliba linuk ka nung iba ozüngji tapet asütsü asü masütsü...??? Tebilemdangtsü tuluka lir. Ano Nashi metepsettsü ozüng yanglutsü kanga sashia jembir...Saka kin tilatem aser Khristan-tembo mapayui reshikangshir aser tepseter...Tesungmangtsüka, tang yimsu tesudak Center sorkar nung mimchir taküm ka dang nungi Nashi-ang taoba züngshiba yimsusur aika lir...!!!

Anungji Naga nunger Khristan tajungtem...Political Party daka meranglokli, sen daka meranglokli, aser Political Leader daka meranglokli...Saka asen tamangba yimsu aser ayak wazuka ayutsü atema asen 'Vote' agütsüdi. Ashiko, tang yimsu tesudak sorkar yagisa maneni yimsusua ora, mapang kabo...Asenok asen lima nung pei tetsü oshi mejembidaktsüsü aser pei amangnuba yimsu mamangdaktsüsü mapang ka arutsü-a shibai metet...!!! Hindu yimsu mamanger-bo, Hindi oshi mejembir-bo, 'Jai-Matadi' aser 'Hi-Ram' ta mashir-bo sorkar mapa nung manioktsü, UPSC/SSC/SSB etc. ama Exam. magütsüdaktsüsü aser Ration Card/PDS/Facility magütsütsü ta ozüng yanglutsü mapang ka arutsü-a shibai metet...??? Anungji asenoki asen temeden 'Vote' sen-yong meyokli aser kanga shisa ka-a asen madak yimsusur shimdi.

**Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazünger i angateta agitsü mepishir**

Nigerian pastor aser kinungtsü küm asem tepuokdak yur chiok



Abuja, Metsüremi/March 26 (Agencies): Nigeria nung pastor ka aser pa kinungtsü (ECWA Church) nung sayutsüngisang yagi tetsürla ya nati arishi küm 12 tain tetsür ka pua bener oa tamangba yimsü melendaktsü ta tai tonglokja aliba nungi temeden nguogo.

Nigeria nung Rev. Jonah Gangas aser pa kinungtsü Josephine na temeden anguba ya kanga tesüngmangtsüka lir, kong Khristanpur reshikangshiba tali akumer.

ADF International ajanga ashiba agi Jonah aser Josephine Gangas nati Muslim tsür ka kidang nungi jena oa aliba 2013 küm anioka küm agütsüba atema pelar aser dangar den temeim lemsatepba asoshi shinga memerenshitsüla, ta ashi.

Secondary school züngzükba sülen tetsürla ya tanaben lar kinunger den ajurutepa liasü.

Iba sülen Muslim organization kati anir ken o yagi linük nung danga

Khristanpur tim masüba nung merenshia alirtem dak kongshitsü imlar," ta Nelson-i ashi.

Nelson aser ADF International ajanga tawa ang university ana - federal ka aser state ka - nung Khristan kaketsirtem tekelem agütsü atema parnok facilities mamshidaktsüba atema tekundangtsü sangdonga liasü.

"Muslim kaketsirtem nem item facilities amshitsü melar saka Khristanpur nem mamshidaktsür. Anungji parnok sarasademsü mesüra tekülem sentep agütsü atema campus alema aotsüsa akumer," ta pai shia liasü.

Iba ama tenokdangba ya Nigeria indang constitution nung aibelenba lir, kong tamangba yimsü temeden agüja lir ta Nelson-i ashi.

"Linük north tsütsü Khristanpur dak tenük yoker tepsetba aser tawa ang nisung noklang aiba pua bener aoba asadangra. Parnok atema tensa kangasa majung lir," ta Nelson-i ashi.

Open Doors ajanga alima nung Khristanpur alitsü asoshi linük tamajungtiba 50 asadangba 2024 World Watch List nung Nigeria ya jenjang trok buba nung lir.

Alima nung tamangba yimsü mechii Khristanpur tepsetba shilem 82 dak tema Nigeria nung ataloker, ta Open Doors ajanga ashi.

ANOGO ABEN TSÜNGREM DEN

Taküm Aliba Shiti

"Iba shiti mozütsü agi mezülu, saka taküm Tsüngrem Taneli agi zülu; lungpak nung masü, saka shi temulungjang nung züluba, nenok onoki züluba Khrista shiti ta jungkai adoka lir." - 2 Korint 3:3.

Tamanger shiaji Khrista shiti ka ka lir. Tamanger kaji kaket ka dang süra, tapak tapu aika luteta oadoktsü, mejangjai akümtsü, mangateti akümtsü. Tamangertemji mamangertemi azüngtsüba kaket ka dang süra ibaji Khrista jungkai adokba tejashitsü ka dang asütsü.

Saka asenoki ya metettsüla, asenokji shitem lir aser lokti ajak nung atongsemer. Asenok aolen ajak nung alimai asenok azünger aser kaket nung anguba dang nungi asen taküm nungi alimai Khrista tejangjaba angur.

Asenoki Khrista agizükba anogo nungi kaket taputemji asenoki süngdaktsür. Asenok mulungsentsü, mapatem aser taküm agi tazüng aliba tawaji süngdaktsür. Khristai sayuba nai kwika angazüka lir aser benshir ajakji azünger.

Taneli Temeshii ajungshia Pauli iba shiti zülu aser taochi talibusua aliba zülu. Asen mapa nung taochi aser imlibilem akatsüla. Junga angazükang kechiaser ibai zülu lir aser ajaki azünger.

Oba, kü mulung nung Ne taochi aser imlibilem züluba asoshi Ne tenüng asanger.

Pakistan nung Khristan ka atema teimla angur

Lahore, Metsüremi/March 26 (Agencies): Supreme Court of Pakistan ajanga linük nung Islamic tentet tematiba dang Catholic nunger ka tasüba temerenshi agütsütsü atema küm 22 jembia aruba ken o ya shidakba nunga tamangba yimsü mezüngmeshiba asü masüar tejanga ashitsü totuyuba agütsügo ta osang ajanga ashir.

Attorney Rana Abdul Hameed-i ashiba agi, taoba mapang sorkar mapa inyaka alir arishi küm 70 tain Anwar Kenneth-i züluba shiti ya Section 295-C kubok tamangba yimsü mezüngmeshiba indang shia aliba nung aiter asü masüar tangatetba shiang ta Council of Islamic Ideology (CII) aser Khristanpur telok ana dang Supreme Court-i March 12 nung ashi. Iba section nungya Islam indang tesayur Muhammad mezüngmeshiba atema tasüba temerenshi agütsütsü shia lir.

Trial court ajanga tasüba temerenshi agütsütsü obendang agüja aliba Lahore High Court ajanga 2014 küm medentsüba ashi.

"Kenneth-i züluba shiti nung par Khristan yimsü nungi Islam dak mamanger ta dang shia lir. Pai Prophet Muhammad anema o tamajung amshia mali," ta ashi.

Court ajanga Council of Islamic Ideology, Pakistan Church Council aser United Church Council of Islamabad dang April 10 tashinung pei tangatetba ashitsü totuyuba agütsü, ta pai ashi.

Züngsem asem aliba Supreme Court bench ajanga January 2023 nung Kenneth atema legal representation nüngdaker ta ashi, shiba September 2001 nung apuba sülen tepuokdak alir aser Pakistan Bar Council dang defense attorney agütsütsü asüngdang.

Muslim nunger attorney Hammed, shibai tiazü nung tamangba yimsü mezüngmeshiba ta tai tongloksüba ken o aika nung takok ngua temeden ngua jembija aru, pai advocacy group Jubilee Campaign Netherlands teyari nung tamanger asoshi jembitsütsü mulung.

"Tangbo iba ken o pei director inyakba mapang apu. tesayuba yimya nung Pa ya kanga junga zünga asadangtsü tamangba yimsü meteter Khristan yimsü nung tentet dak keta lir aser iba sülen temulung agüja liasü ta par court nem osang agütsütsüla," ta pai ashi.

"Kenneth ya tekolok aser temang meshidak tim atemer aser Punjab Province kubok tepuokdak balala nung aliba solitary confinement nung küm 22 tashi lia aruogo. Pai langa aliba ama obendang ngur kinungertem den küleme lungjemtsü mapang tongogo ta amanger."

July 2002 nung Lahore nung aliba additional sessions judge ajanga Kenneth nem tasüba temerenshi agütsütsü obendang agütsü aser senchi sen 500,000 (US\$1,796) achi. Pa aijaka pai defense lawyer teyari memeshi aser Tsüngrem-i pa yarir ta shia liasü.

June 30, 2014 nü Lahore High Court ajanga iba trial court obendang bhukuma liasü.

Ajisüaka legal counsel maliba mechii ken o jembiba nung tetsüdkaktsü balala ajurua liasü.

Kenneth ya fisheries department nung deputy

"Pai tamangba yimsü indang angatetba tem shiti nunga zülu liasü, saka pai kodanga temeshi nisung mezüngmeshi masü. Pa ola madokdaktsütsü mechii item shiti ya kar amshi."

"Ni temang majungba ajanga küm aika künu den majuruteter. Ni anogoshi pa menungrar, aser ni masüdang pa den mapang indoktsü Tsüngremi maongka ka agütsütsü imlar," ta Bibi-i nüktü yima ashi.

Open Doors ajanga alima nung Khristanpur alitsü asoshi linük tamajungtiba 50 asadangba 2024 World Watch List nung Pakistan ya jenjang tenet buba nung lir.

AO OSHI ANGAZÜKDAK:**TANÜ ANGAZÜKTSÜBA OJANG****Süen**


(v) agiena ayu (drag aside)

* Danüi shime lang ajak süena bener ao.

Süi

(v) oa adok (pass by)

* Nisung aika ozü ki ajanga süi.

OLONG PAITEP # 6739**TIPLÉN**

1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzung tesashi	- (5)	3. Yagi ki okdoker	- (7)
8. S__i	- (3)	5. Yim lenmang	- (5)
9. Nisung rongnung telemza	- (3)	7. Temoatsü keter meyipa aruba	- (9)
10. Anogoshi	- (4)	11. Kangajunga menemba	- (7)
12. Ajanga aor	- (4)	12. Kenyongi majinü	- (5)
13. Tsük rizüngdak	- (3)	13. Rong kanga tulu	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 6738 TELANGZÜBA**TIPLÉN :**

1. Tanga, 6. Wara, 7. Rajang,	2. Anga, 3. Yabang, 4. Tarok,	9. Anük, 10. Jenjang, 11. Alar,	5. Orak, 8. Ainer, 9. Anema,
14. Ngashi, 15. Nala, 16. Mech.	10. Jabili, 11. Among, 12. Miim,	13. Anem.	

LANGTSÜNGLEN

1. Tenük telong	- (9)
2. Committee dang ajar	- (5)
3. Yagi ki okdoker	- (7)
5. Yim lenmang	- (5)
7. Temoatsü keter meyipa aruba	- (9)
11. Kangajunga menemba	- (7)
12. Kenyongi majinü	- (5)
13. Rong kanga tulu	- (5)

NAI-A YA METETTER MA

March 18 nungi 23, 2024 tashi
Nagaland nung 3 buba North East Games (NEG) 2024 nung takok angurtem tarensten

**Himanta Sarma anema defamatio suit benoktsü: Bhupen Borah****Himanta Biswa Sarma****Bhupen Borah**

Guwahati, March 26, 2024

(Agencies): Assam Congress president Bhupen Borah-i kobi melii BJP nung adentsü ta Chief Minister Himanta Biswa Sarma-i ashiba atema defamatio suit ka benoktsü.

"CM Himanta Biswa Sarma-i yamai jembia ken o tem belener. Ni akangakanga noktaka lir ta media dang sayutsü atema ni asüng CM Sarma anema defamatio suit ka benoktsü" ta ta Borah-i Jorhat nung osangbener den jembidang ashi.

"Himanta Biswa Sarma-i tatalokbatem nungi nübor tem anientsü atema iba amai kuli maliba onüktem jembir. Ni BJP nung adentsü kuli kecha mali" ta pai ashi.

"Ni BJP nung adenba ajanga nübor tem khuret mekoktetsü. Ibaji ajanga Assam nung kin 6

dak sendakba tebilemtsütem mekoktetsü mesüra elections nung nangzükbatem

meinyaktettsü" ta Borah-isa metedaktsü.

CM Sarma-i nangzükbatem meinyaktet anungji media aser sensotem anisatsü atema kuli maliba olentem jembir, ta pai ashi. 2026 Assam state elections nung Borah-i Assam Chief Minister Himanta Biswa Sarma den tokteptsü.

"Assam CM Sarma-i menden ana nung tokteptsü ta ashir anungji nenoki repranga liang, ni pa den menden anaprong nung tokteptsü" ta Borah-i ashi.

Bharatiya Janata Party (BJP) kübok democracy lendong nung lir aser parnoki tetsür tashi itdakstsü indang jembir saka Assam nung Lok Sabha menden 14 nungi 1 nung dang tetsür candidate ka dang lir, ta Borah-isa metedaktsü.

"BJP-i Kaziranga Lok Sabha constituency atema Rajya Sabha MP Kamakhya Prasad Tasa shimogo. Tasa-i mapa ana

ayongzükba sentong ka nung mangatetep adoka iba ya atalok ta osang angazüker.

2026 tashi nung Hindu nunger teimba ser alidak Congress malitsü aser 2032 tashi nungbo Muslim nunger teimba ser alidak Congress agentsü ta paisa ashi.

MLA Bharat Narah-i Congress toktsüba sülen pai BJP nung adentsü asü masü ta osangbenerisa asüngdangdang "Bharat Narah aser pa kinungtsü Ranee Narah na indang phone switched off lir, iba lagi tena BJP nung adentsü junga mejembitep" ta CM Sarma-isa langzü.

NEHU nung Holi benjung amongdang raratep; 2 yiru

Guwahati, March 26, 2024

(Agencies): North-Eastern Hill University Students' Union (NEHUSU) züngsemtem aser Rashtriya Swayamsevak Sangh (RSS) den sendaktepa aliba telok ka tsüngda mangatetep adoka raratep.

Hombarü NEHU, Meghalaya nung Holi amongdang raratep aser idangji nisung ana yiru. World Organisation of Students and Youth (WOSY) ajanga

ayongzükba sentong ka nung mangatetep adoka iba ya atalok ta osang angazüker.

"RSS aser BJP den sendaktepa aliba Akhil Bharatiya Vidyarthi Parishad (ABVP) züngsem noklang ana shi kati university rules alema campus telung nung benjungtep" ta NEHUSU-i ashi.

Nisung asemi teka sangshiba atema NEHUSU Vice President Easterson

Sohtun-i FIR ka benokogo.

NEHUSU züngsemtemi university temzung nung ajemdaker noktak ta Easterson Sohtun-i ashi.

WOSY-i ayongzükba sobaliba sentong nung adentsü atema ABVP jaok aser NEHUSU-i iba sentong nung meinprong agütsü ta ABVP-i ashi.

Police-i iba tatalokba bushisüngdang südar aser telok anaprongi FIRs benokogo.

ITLF-i Kuki nunger dang prangpong magütsütsü tuyur

Imphal, March 26, 2024

(Agencies): State sorkari Lok Sabha elections jakdang prangpong bendentsü tetuyuba agütsüba meshir saka arms license holders-i prangpong agütsüba ya onoki tang timtem ajurua aliba den meputep" ta ITLF-i ashi.

Manipur sorkari tawa tu pei pei anasa aliba police station nung prangpong agütsütsü tetuyuba agütsü aser ibaji ITLF-

i magizüker.

"State sorkari election dak sendakba nung prangpong bendentsü tetuyuba agütsüba meshir saka arms license holders-i prangpong agütsüba ya onoki tang timtem ajurua aliba den meputep" ta ITLF-i ashi.

Iba ajanga ashishitep ken o adoktsü aser Kuki-Zo nunger tetsübu tia ka nung alitsü ta parnokisa ashi.

"Kuki-Zo nunger pei taküm aser ali kümzüka ayutsü atema prangpong-injang nüngdaker. 2023 nung agütsüba licensed guns meyipa mangu" ta Indigenous Tribal Leader's Forum (ITLF)-isa metedaktsü.

Kuki-Zo nunger ajaki ketdangsürtem tangatetba sülen manidaktsü ayongzükter ta ITLF-isa ashi.

Francis Scott Key Bridge dak rong agi tsüker chirep



Baltimore, Metsüremi/March 26 (Agencies): United States kubok Baltimore yimti nung nüngtugu Francis Scott Key Bridge nung rong kati tsüka chirepogo.

Iba apu ya mile 1.6 (2.6 km) talang lir aser container bera aliba rong kati nokdang ka nung atsük dhang iba apu nung gari aika jaja liasü.

Iba apu chirepba sülen nisung tenet tzü nungya alitsü südi ta amanger aser tzü telung nung gari aika tsüka aliba putetogo, ta kettangsürtem ashi.

Iba lendong atalokba tesem nung rong tila aser helicopter tem arua nisung bushia kumzükba maparen inyaktar.

Singapore nisan songa aliba container ship, Dali yagi arishi

küm 47 tain apu indang support column ka nung Mongulbarne 01:30 (05:30 GMT) ako meta atsük aser apu ya chirep.

Iba rong ya Port Breeze nungi anepdang 12:45 ako meta ayameso aser Sri Lanka yimtiba Colombo bushia aoba mapang iba lendong ya ajuru.

US federal government agency kati ashiba agi, iba rong ya rongnendak nungi ayamesodang propulsion raksa.

Iba sülen rong kettangsürtemi Maryland transport kettangsürtem dang apu nung atsüksü akok tekumdagtsü metedaktsü, ta osang kar ajanga ashir.

Gari aika tzü telungi alu, ta kettangsürtem ashi.

Baltimore fire department,

US Coastguard aser danga Maryland state agency temi anir rescue operation tenzükogo.

Baltimore Fire Chief James Wallace-ia nisung ana kumzükba indang shiogo aser ka kanga mejungi yirur mozuki bushia anir ogo ta ashi.

Francis Scott Key Bridge ya four-lane apu ka lir asr Patapsco ayong nungi feet 185 (56 metres) ajungketa lir, koba 1977 küm lapok.

Iba apu ya ajanga küm ka nung gari million 11.3 senzür aser ibai I-695 highway nung lir, koba agi Baltimore meketer aser Baltimore Beltway ta ajar.

Iba apu laoba sülen Baltimore Mayor Brandon Scott-i state of emergency sangdonga lir.

Pelaba Lemsateper

Onoki teti meima aliba asür tsürabur Kimenjungla Sanglir (Molungkimong) shirangba mapang nungi akumli wadang tembangba anogo tashi adianu, kiyonger, Argo balala, kija kibong aser lokti tentet kwikati sarasadem, nübu, shisatsü aser rongsen agi onok den yaritepogo, nenok ajak dang pelaba lemsateber.

Ozüi kecha meypa agütsütsü mali saka takarsang Tsüngremi nenok mapa tajung asoshi moajang ta sarasademsür.

Temeim chirnur, semchir, anükapang aser Kinungertem



TASOBA : 05/08/1934
TASÜBA : 25/03/24

Pakistan nung China nunger pongu tepset

Islamabad, Metsüremi/March 26 (Agencies):

Northwest Pakistan nung pei temang nung bomb alenoker pokdaktsür kati convoy ka amakba sülen China nunger pongu tepsetogo, ta police kettangsür kati metedaktsü.

Pei temang nung bomb alenoker pokdaktsür kati gari nung bomb inoka bener arur China nunger engineer tem mena aliba convoy ka dak tsükokja bomb pokdatsü. Parnok ya Islamabad nungi Khyber Pakhtunkhwa province kubok Dasu nung parnok indang campi oya liasü, ta regional police tekolakba Mohammad Ali Gandapur-i Mongolbarnü metedaktsü.

"China nunger pongu aser Pakistan nunger gari anir ka iba

lendong nung süogo," ta Gandapur-i ashi.

Dasu nung ya tzünokdang tongtibang ka yangludar aser taoba mapanga iba tesem ya makogo. 2021 küm bus ka pokdaktsüba sülen China nunger teku densema nisung 13 pokset.

Lendong atalokba sülen Khyber Pakhtunkhwa police iba tesemi oa teyari agüja liasü. Convoy nung tanungba nisungtem ajak kümzükogo, ta Gandapur-i ashi.

Telungpurtemi Pakistan naval airbase ka maka paramilitary sepai ka tepsetba sülen ghonda ishika lir iba convoy ya maka liasü. Naval airbase amakba mapang security forces temi meyiper telungpur pongu tepsetogo, ta kettangsürtemi Mongolbarnü

Hombarnü southwestern Pakistan kubok Turbat base amakba densema ethnic Baloch fighters temi hopta ka ana tsüngda military facility tanabenbuba makogo.

Pakistan Navy otongdar kati ashiba agi, base amakertem-i base telungi aittsü merangba sülen parnok ponguprongla tepsetogo. Iba lendong nung paramilitary sepai ka tepsetogo, ta military-isa metedaktsü.

Baloch Liberation Army (BLA)-i iba tesem amakba nangzükogo. BLA puri taoba mapanga iba tesem aser tangalen Pakistan aser China na longjemer mapa inyaka aliba tesemtem aser mapa balala dak sendaka alirtem makogo.

OFFICE OF THE MOLUNGYIMSEN SENSO MUNGDANG

P.O. TULI, MOKOKCHUNG : NAGALAND

TENÜNGSANGAGÜTSÜR

Molungyimsen Senso Mungdang-i Wb. Tiameren Jamir aser Wt. Imsuinla Lemtur na jala Kr. Temjentemla-i Nagaland University Lumami nungi Master of Arts (Geography) nung Gold Medal anguba atema kanga dang nüma tanga la nem tenüngsang tulu agütsür.

Lai yimtsüng asoshi konang bentsür aruba atema Senso Mungdang-i kanga pelar aser tarutsü wadang ajak moatsür.

Sd/-
N. Joseph Lemtur
President

Sd/-
B. Imsuinba Jamir
General Secretary

Office of the

Khensa Senso Service Union

Mokokchung, Nagaland

TENÜNGSANG AGÜTSÜR

Khensa Senso Service Union ajanga tsünglangen agüja alirtem nem konang tetushi aser tenüngsang agütsür:

1. Er. Tiatemsü, S/o Lt. Imtiyapang, Addl. Chief Engineer, Housing (NPWD) mendeni atuba.
2. Bendanginla, D/o Lt. Longrimongba, Grade-I Stenographers, Home (SAB) jenjangi atuba.

Parnok tarutsü wadang nung takokba lidakjang ta Union-i maneni sarasademsür.

Sd/-
Purtemjen
President, KSSU

Sd/-
Bendangangla
Gen. Secy. KSSU

Venezuela opposition-i tir election atema candidate register mesütet

yuogo.

Plataforma Unitaria Democratica (PUD)-i Mongolbarnü video osang ka ajanga ashiba agi, atakzükja aliba anogo aser mapang tashi nung electoral authority indang online registration system nung parnok indang tir candidate Corina Yoris tenüng register mesüteti liasü.

Kidanger linük temia July 28 nü agitsü aliba election atema Tir Maduro-i tang tashi nungbo pa den toktepetipurtem kanga takok ngua nokdanga aruba süoki ia bilemba lemsatepogo. "Parnoki onok maitdaktsü," ta coalition kettangsür Omar Barboza-i ashi. Registry

lapokshitsü ayongzüka pai, Venezuela nunger timba shirnoki temelensi ka aginer parnok temeden magütsü aibelenba atema sorkar aitsüogo.

Arishi küm 80 tain Corina Yoris ya PUD candidate asütsü shimba Maria Corina Machado-i taoba hopta sangdonga liasü.

Liberal Vente Venezuela party lenir yagi taoba küm opposition indang nomination ya vote aika agi koka liasü, ajisüaka la election nung metokteptsü atema Supreme Court-i tenokdangba agüja liasü.

Tir candidate asütsü atema

Yoris shimtsü ta nüburtemi mimlai liasü. La ya tang tashi nungbo aikatibo jangja maliasü. Nüburtem ajaki metettsüa lai tang tashi nungbo taoba küm opposition primary ayongzüka nung teyari agütsüba dang lir.

Taoba küm Maduro den tokteptsü atema candidate ka shimra ozüng alema inyaksangshirtem ama obendangtsü ta sorkari amokmerenba mangai opposition party-i longkak aitba sentong ka ayongzük, kong voter million 2.4 dak temai shilem agia liasü.

Ajisüaka la kangabo mejangai aliba, ken o tamajung kecha sendaka maliba aser

ajaki otsüla ka ama bilemba ajanga ajaki sakloka kümogo.

Venezuela nunger voter tem nem kecha tenokdangba magütsüi vote agütsüdaiksüra Maduro-i election ya vote aika agi makoktsü, ta poll balala ajanga sayuogo.

Tang tashi nung July election nung tokteptsü atema candidate 10 züngoksema lir. Ajisüaka parnok rongnung kati danga Maduro akoktsü mimlar.

Argentina, Costa Rica, Ecuador, Guatemala, Paraguay, Peru aser Uruguay nungeri külem sangdong ka ajanga Tir election atema PUD candidate register mesütetba ya tebilemtsü ka lir ta shiogo.



Nicolas Maduro

Caracas, Metsüremi/March 26 (Agencies): Venezuela nung opposition coalition tongtibai ashiba agi, taruba tir election nung Nicolas Maduro den tokteptsü atema parnok indang candidate register mesütaktsü parnok nokdanga

Inter-District GHSS & GHS asayamung tenzükogo



Dimapur, Metsüremi/

March 26 (TYO): Inter-District GHSS & GHS Tournament 2024 lapokba sentong March 26 nü Meriema Ground nung agiogo. Iba sentong nung Director School Education, Nagaland Wonthungo Tsopoe tongti tejaoker liasü.

Iba asayamung ya Samagra Shiksha Nagaland-i senotsü teyari agüja tang asayadaki.

Asayamung lapokba

sentong nung o jembiba mapang Tsopoe-i, angazükba nung rangloker meimchir ama yimjung nung alitsü atema kaket shisatsü angazüktsü koda tongtibang iba indang lemsatep.

Paisa, saisapong ajanga tangazükba agütsütsü koda tongtibang iba indang lemsatepba den, rongsen aser teyari peria maliba ajanga sempet aketba lanurtem aika sentoka toktsüba, iba indang

lemsatepa laisü.

Pai kaketshirtem dang pei dak aketba sempet tajungtiba amshia asayatsü ajungshia liasü. Maneni Tsopoe-i tsürapurtem aser physical tesayurtem dang, sempet aketba asayartemi pei sempet bushitetsü atema parnok ajungmeostsü mepeshia liasü.

Paisa, kaketshirtem dang taküm nung libaliro azüoka alitsü ajungshi aser ashiba agi, temesepba mozü aser tanga

temesepba chiyongtsütem nungi pila melira nisung kati pei taküm nung kecha majangzüktettsü. Pai, Naga nungertemi saisapong nung takok tajung angubatem indanga lemsatepa liasü.

Maneni tongti tejaoker-i, asayamung nung shilem agirtem dang anogo ana asayaba mapang asayar yimya tajungtiba benshia asayatsü ajungshia liasü.

Asayamung lapokba

sentong ya Physical Education tesayur Vitsoliekeyho lenistüba nung agi aser pastor Phezoucha Baptist Church, Keduoneituo Yhome-i temaotsü meshizüka sarasadema liasü. Sentong nungsa T. M. GHSS kaketshirtem ken tajung ka aten, asayamung nung referee Neilazet uok hezhie-i ketdangsüa asayartem tenangzüktetba agi aser iba sülen tongti tesemdangeri asayamung tenzükja liasü.

2Buba SYU Open Futsal Tournament tanü tenzükogo

Mokokchung, March/ Ward-i temerüktiba Ward **Metsüremi 26 (TYO):** sempet agizük ta tenungsang agüja ashi.

Salangtem Youth Union-i (SYU)ayongzükba 2Buba SYU Open Futsal Tournament tanü lanurtemi küm anabuba tashi Mojibi Futsal Turf nung Futsal tournament ayongzüka Additional Deputy akaba ajanga lanurtem asya nung aniteter, shirnokisa iba Mokokchung Municipal Council Chumlamo Humtsoe tetushi tesemdanger süa tenzüksüogo.

Asaya metenzük dang sentong tatstuка agiba mapang temelensi aitdakja nü taküm nung temelensi kadakstsütsü meranagang, ta ADC Mkg.-isa Ward 18 rongnungi kanga dang akhümket keta aser longjem

Kasa sentong nung SYU Tir longjema alibaji Salangtem ward ya ka lir, toaba 2023 küm Mokokchung nung Ward-tem merükmejuba nunga Salangtem

Association Tournament Secretary Imnayanger tenatia tayongzükba o jembiba den Imnamentai ken tajung ka tena sentong tobur jungdaktsü, sentong nung Tsüngrem temoatsü jazüka Rev.Sentimeren-i sarasadem aser Tiakala Longkumer ketcangsüba nung iba sentong agia liasü.

Iba tournament ya Mokokchung District Football Association akhümkübok nung "Focus to Endure" ta asüba omen nung ajemdaker agir aser official partnerji Nagaland Minerals & Mines lir. Anogo asem nü monga asayatsü sentong renema aliba nung team 22-i shilem agia tokteptsü.

Taoba CFA mendenbuba taküm tepeyong tepuokdaki yokogo

Metsüremi/March 26, 2024 (Agencies): USD 11 alang sübokrem

million 11 alang sübokrem agiba atema taoba Chinese Football Association mendenbuba taküm tepeyong tepuokdak ayutsü obendang agütsüogo, ta state media sangdong ka ajanga Mongolbarnü metedaktsü.

Tir Xi Jinping lenisüba kübok China nung saisapong aser talisa football asaya nung ochi mashi ken o dak sendakba nung ketdangsürtem aika mapa nungi anenja arudar.

Taoba national team coach Li Tie densema CFA kübok lenir aser executive 10 shi kümtem tsüngda mapa nungi anentsüogo.

Taoba mendenbuba Chen Xuyuan-i CFA aser tang lokti tentet nung pa jenjang maongka agia ozüng alema tangar dang nungi yuan million 81.03 (USD million 11) meshia agiogo, ta Communist Party meyong People's Daily osang kaket sangdong ka ajanga metedaktsü.

Sübokrem aika agiogo aser pai iba jenjang agiba ajanga inyakyim nung aibelenogo aser national football industry akoksadaktsüogo, ta kasa sangdong ajanga metedaktsü. Xi ya football asaya meimba nisung ka lir aser pai linük nung World Cup

Tanga ken o obendanga sülen taoba coach Li-a densema alitsü akok, shiba Chen den kanga junga sendaktepa liasü.

BILEMDANGANG

"Tamakok mapang nunga tangazüktsü peria lir."

BCCI-i IPL mapanglem tanungba sangdongogo

New Delhi, Metsüremi/ Iba sülen Qualifier 2 aser final **March 26 (Agencies):** Board of Control for Cricket in India (BCCI)-i Hombarnü

Indian Premier League (IPL) 2024 nung tanungba asayatem atema mapanglem sangdongogo aser final asaya May 26 nü Chennai nung asayatsü jangjaogo.

Asayamung nung asaya 74 prongla India nung dang asayatsü, ajisüaka Lok Sabha election aliba ajanga anogo aser asayatsüba tesemtem tembanga melemteti liasü.

Asayamung nung semi aser final ya Ahmedabad aser Chennai nung asayatsü. Qualifier 1 aser Eliminator ya May 21 aser 22 nü Narendra Modi Stadium Ahmedabad nung asayatsü.

tanungba home asaya ajak Arun Jaitley Stadium, Delhi nung asayatsü.

Punjab Kings pur parnok indang asayatem PCA New International Cricket Stadium, Mullanpur nung asaya-a tenzükogo aser home nung asayatem ya Dharamsala nung asaya-a tembangtsü. Dharamsala nunga ya May 5 aser 9 nü Chennai Super Kings aser Royal Challengers Bengaluru den asayatsü.

Maneni Rajasthan Royals-ia, league asaya nung tembangbubaa asaya ana Guwahati, Assam nung asayatsü atema telemtetba agiogo. Parnok May 15 nü Punjab Kings aser May 19 nü Kolkata Knight Riders den asayatsü.